

07.09.2017.



Ministar za privredu Bosansko-podrinjskog kantona Goražde Anes Salman i predstavnici neprofitnih organizacija s područja našeg kantona danas su, u prostorijama resornog ministarstva, potpisali Ugovor o korištenju sredstava po Programu utroška sredstava Ministarstva za privredu za podršku razvoju neprofitnim organizacijama Bosansko-podrinjskog kantona Goražde za 2017. godinu.

Riječ je o tri neprofitne organizacije koje su potpisale ugovor, a koje djeluju na području Bosansko-podrinjskog kantona Goražde – Privredna komora, Obrtnička komora te Udruženje poslodavaca Bosansko-podrinjskog kantona Goražde.

Prema navodima resornog ministra Anesa Salmana, potpisivanje današnjeg ugovora je nastavak dugogodišnje saradnje koju Ministarstvo za privredu ima sa neprofitnim organizacijama s područja našeg kantona čije postojanje je veoma važno za Bosansko-podrinjski kanton Goražde.



„S obzirom na to da smo zajednički uključeni kroz razne aktivnosti, cilj nam je da radimo na unapređenju poslovnog okruženja, kao i na pružanju svih drugih vrsta podrške privrednim subjektima, obrtnicima itd. Mi smo i u narednoj godini planirali da na ovakav način podržimo i Ekonomsko-socijalno vijeće, kao jedno tripartitno tijelo“ – kazao je on.

Također, predstavnik Obrtničke komore Bosansko-podrinjskog kantona Goražde Sead Efendić izrazio je svoje zadovoljstvo i zahvalnost resornom Ministarstvu na pružanju podrške

neprofitnim organizacijama i na ovakav način.

„Ovo je u posljednjih pet-šest godina praksa da Ministarstvo privrede i Vlada izdvajaju sredstva za pomoć neprofitnim organizacijama. Mislim da je ovo dobar način da se pomogne Obrtničkoj komori, Privrednoj komori i Udruženju poslodavaca, radi boljeg i uspješnijeg poslovanja za sve nas. Ova sredstva koja se izdvajaju su uglavnom namijenjena za održavanje kancelarija, odnosno naših ureda u kojima se obavljaju usluge obrtnicima, poslodavcima i privrednicima“ – kazao je Efendić.

